

# Nuwe Lied Bediening

En Hy het 'n nuwe lied in my mond gegee, 'n lofsang tot eer van onse Elohiem (Ps. 40:4)

E-pos: [kontak@nuwelied.info](mailto:kontak@nuwelied.info)  
Webwerf: <http://www.nuwelied.info>

## In Gees en Waarheid.

So dikwels word die volgende uitlating gehoor: *Ons aanbid die Vader in Gees en waarheid!* Dié wat dit sê, glo dan ook dat hulle die ware aanbidders is! Maar verstaan diegene wat hierdie stelling maak die werklike betekenis van wat hulle sê?

Ons lees in Joh. 4:23 en 24 waar Yeshua die volgende sê:

*maar daar kom 'n tyd en dit is nou, wanneer die ware aanbidders die Vader in Gees en waarheid sal aanbid, want die Vader soek dié wat Hom só aanbid. God is Gees en dit is toepaslik dat hulle wat Hom aanbid, in Gees en waarheid aanbid (PWL<sup>1</sup>)*

Eerstens moet ons daarop let dat Yeshua praat van die *ware aanbidders* van die Vader. By implikasie beteken dit dat daar ook diegene is wat nie ware aanbidders van die Vader is nie! Met ander woorde daar is diegene wat die Vader aanbid, maar hulle word nie gereken as as ware (egte) aanbidders nie en kan dus beskou word as vals (onegte) aanbidders! Dit herinner aan die woorde van Yeshua toe Hy gesê het:

*Tereg het Jesaja oor julle, geveinsdes, geprofeteer soos geskrywe is: Hierdie volk eer My met die lippe, maar hulle hart is ver van My af. Mark. 7:6*

Wat beteken dit om te aanbid? Om te aanbid is om eer te betoon, te bewonder, verootmoediging; neer te buig; plat op die aangesig in bewondering te lê en 'n nederige onderdanigheid met 'n gesindheid van absolute bewondering. Hierdie handeling en demonstrasie is egter nie volgens YHVVH se maatstaf die bewys van ware aanbidders nie, want die persoon wat 'n afgod aanbid kan op soortgelyke wyse handel (optree). Die handeling, of die wyse wat aanbid word, bepaal dus nie of dit ware aanbidders van YHVVH is nie. Nee, ware aanbidders word gekenmerk as diegene wat in Gees en in waarheid aanbid! Om 'n ware aanbidder van die Vader te wees moet daar dus in Gees en waarheid aanbid word. By die wat nie ware aanbidders is nie ontbreek die Gees en die waarheid.

Derhalwe moet ons die betekenis *van in Gees en in waarheid* ondersoek om te verstaan wie ware aanbidders van die Vader is. Die vraag is dus: *Hoe word die Vader in Gees aanbid en hoe word die Vader in waarheid aanbid?*

### In Gees

In sommige vertalings van Joh. 4:23 en 24 word *gees* met 'n kleinletter gespel. Yeshua het egter verwys na die Afgesonderde Gees, want soos diegene wie se harte besny is die Vader in die Gees dien (Fil. 3:3), so moet ons die Vader in die Gees aanbid! Die Afgesonderde Gees is die Karakter en Outoriteit van YHVVH soos wat dit in YHVVH se Torah (die wet) openbaar word en in die tien gebooie opgesom word. Yeshua Messias is die vleesgeworde Torah van YHVVH (1 Joh. 1:1 en 2). Ware aanbidding is dus Torah gefokus. Ware aanbidding is dus om deur die Gees in die Karakter en Outoriteit van YHVVH se Torah eer

<sup>1</sup> PWL Vertaling (Pad van Waarheid tot die Lewe) kan gratis afgelaai word by [www.padwlewe.ch](http://www.padwlewe.ch)

*te betoon, te bewonder, jouself te verootmoediging, neer te buig en met nederigheid plat op die aangesig in absolute bewondering te lê.*

Daarom kan die persoon wat YHVH se Torah verwerp as uitgedien nie 'n ware aanbieder wees nie, want die Gees is die openbaring van YHVH se Torah wat ons leer en herinner aan alles wat YHVH Yeshua gesê het (Joh. 14:26)!! Ware aanbidding sonder die Gees van Torah is onmoontlik!

## **In Waarheid**

Die Afgesonderde Gees is die Gees van Waarheid!

*maar wanneer Hy, **die Gees van die Waarheid**, gekom het.... Joh. 6:13*

*...en dit is die Gees wat getuig, want **die Gees is die Waarheid**. 1 Joh. 5:7*

Die Skrifte getuig ook dat YHVH se Torah die waarheid is!!

*Die vrees van YHVH is rein: dit bestaan tot in ewigheid; **die verordeninge (Torah) van YHVH is waarheid** – tesame is hulle regverdig. Ps. 19:10*

*U geregtigheid is geregtigheid tot in ewigheid, **en u wet (Torah) is waarheid**. Ps. 119:142*

*U, o יהוה, is naby en **al U opdragte (Torah) is waarheid** – Ps. 119:151 – PWL.*

*Al u gebooie is waarheid; hulle vervolg my sonder oorsaak; help my! Ps. 119:86*

Hiervolgens is dit ook duidelik dat elkeen wat YHVH se Torah verwerp as uitgedien nie in waarheid kan aanbid nie, want YHVH se Torah is die waarheid!!

Vader-God soek diegene wat Torah-gehoorsaam in Yeshua is, want dit is alleenlik hulle wat Hom in Gees en Waarheid kan aanbid. Vertrou in Yeshua as Middelaar tot sondevergifnis en versoening met YHVH, en wat opgevolg word deur 'n sielsbegeerte tot gehoorsaamheid aan YHVH se Torah (Sy onderrig en instruksies) onderskei die ware (egte) aanbidters van die vals (onegte) aanbidters. Diegene wat **nie** in Gees en Waarheid aanbid **nie**, is diegene wat hulself as vry van Torah (die wet) beskou.

Geen mens kan dus in Gees en Waarheid aanbid indien YHVH se Torah verwerp word as uitgedien! Die mens wat verklaar dat hy vry van YHVH se wet (Torah) is, aanbid met 'n onrein gees (met onrein lippe) die leuen!

Ons lees in Jes. 6:5 die volgende woorde uit die mond van die profeet Jesaja:

*Wee my, ek is vernietig, want ek is 'n man van onrein lippe en ek woon onder 'n volk van onrein lippe, want my oë het die Koning, יהוה-Tzva'ot, gesien!" (PWL Vertaling)*

Telkens wanneer Israel in Torah-ongehoorsaamheid verval het, het hulle lippe onrein geword, want die woorde wat hulle by Sinai gespreek het, naamlik: *Al die woorde wat YHVH gesê het, sal ons doen* (Ex. 24:3), het 'n leuen geword. Israel se reinheid het in onreinheid verander! Onthou: Die nageslag van die wat by Sinai gestaan het, was as te ware self ook teenwoordig toe YHVH die verbond van die Torah met Israel gesluit het. Deur die mond van Moses het YHVH vir Israel gesê:

*Ek sluit nie nou hierdie verbond en hierdie eed met jul alleen nie, maar beide met hulle wat vandag hier saam met ons voor die Teenwoordigheid van יהוה, ons God, staan én met die wat nie vandag hier saam met ons is nie. Deut. 29:14 en 15 .*

Hiervolgens is dit duidelik dat Jesaja as te ware ook by Sinai teenwoordig was. Daarom het Jesaja, toe hy die visioen van die manifestasie van YHVH se Teenwoordigheid in die tempel ervaar het, uitgeroep: *Wee my, ek is vernietig, want ek is 'n man van onrein lippe en ek woon onder 'n volk van onrein lippe!* Jesaja

het onder die diepe besef van sy eie sonde gekom, asook onder die besef van die sonde van die volk onder wie hy woon, en dus van sy eie onwaardigheid om in YHVH se teenwoordigheid te staan. Jesaja het geweet dat dit wat onrein is (Torahloos is) nie in YHVH se teenwoordigheid kan of mag staan nie.

Maar daar waar daar 'n besef van sonde, naamlik die oortreding van Torah is wat met opregte berou gepaard gaan, daar is die genade van YHVH oorvloedig. Daarom sê Jesaja:

*Toe het een van die serafs na my toe gevlieg met 'n brandende kool in sy hand, wat hy met 'n tang van die altaar afgehaal het. Hy het my mond aangeraak en gesê: "Let op, dit het jou lippe aangeraak en jou wetsoortreding is weggevat en jou sonde vergewe." Jes. 6:6 en 7 – PWL Vertaling*

Jesaja se oortreding van Torah (sy sonde) is vergewe deur 'n brandende kool vanaf die brandofferaltaar – die plek waar daar vir die sondes van die volk geoffer was. Nou het Jesaja se onreinheid in reinheid verander. Sy onrein lippe was nou lippe van reinheid en hy was gereed om as profeet na die volk te gaan om hulle te waarsku van YHVH se naderende strafgerigte indien hulle nie terugkeer tot Torah-gehoorsaamheid nie.

Soos Israel en Jesaja het ons ook as te ware by Sinai gestaan en bely dat *al die woorde wat YHVH gesê het, sal ons doen*. Ons rein lippe het egter in onrein lippe verander weens ons Torah-ongehoorsaamheid. Ons onrein lippe het gemaak dat ons nie in Gees en Waarheid aanbid nie!!

Wanneer ons egter soos Jesaja met berou tot die besef van ons onreinheid kom, sal 'n brandende kool van YHVH se brandofferaltaar, naamlik van die folterpaal waaraan Yeshua gehang het tot vergifnis van ons sonde, ook ons lippe aanraak sodat ons weer rein kan word. Wanneer ons dan voortgaan om met ywer die geregtigheid van Torah-gehoorsaamheid te doen, dan is ons ware aanbidders wat YHVH in Gees en Waarheid aanbid!

Onthou: Volgens Hebreuse denke is Torah-gehoorsaamheid die hoogste vorm van aanbidding! Lofpysing (aanbidding) deur sang en musiek is slegs 'n uitvloeisel van ware aanbidding wat in Torah-gehoorsaamheid gefundeer is! Die sigbare handeling tydens aanbidding en die demonstratiewe wyse wat aanbid word, bepaal dus nie of ons ware aanbidders van YHVH is nie.

Is jy 'n ware aanbidder wat in Gees en Waarheid aanbid?

**Nota:** 'n Afrikaanse lering van Bride Ministries oor ware aanbidding kan geluister / afgelaai word deur op die volgende skakel te klik: <http://brideministries.co.za/?cat=6>

Lees ook ons artikel: *Met watter gees is jy gevul?* Wat beskikbaar is deur op die volgende skakel te klik <http://nuwelied.info/wp-content/uploads/2014/01/GB1.Jan14WatterGees.pdf>

*Ontvang YHVH se Woord met welwillendheid, maar ondersoek self die Skrifte of hierdie dinge die waarheid is (Hand. 17:11).*

Shalomgroete.  
Johan

Epos: [kontak@nuwelied.info](mailto:kontak@nuwelied.info)  
Webwerf: <http://www.nuwelied.info>

*Kopieë mag gemaak en gratis versprei word, maar mag nie verkoop word nie. Geen veranderinge mag aan die oorspronklike teks aangebring word en dit dan onder die naam van Nuwe Lied Bediening versprei nie.*